

Nacionalni fond za demokratiju: Plaćeni da proizvode neprijatelje Amerike

U.S. Congress Rep. **Ron Paul**

Institut pod lažnim imenom "*Nacionalni fond za demokratiju*" (*National Endowment for Democracy* – *NED*) nije ništa do preskupi projekat koji izuzima novac američkih poreskih obveznika radi promocije favoriziranih političara i političkih partija u inostranstvu. Ono što *NED* radi u stranim zemljama putem svojih kćerinskih organizacija *Nacionalni demokratski institut (NDI)* te *Međunarodni republikanski institut (IRI)*, bi u Sjedinjenim Državama istog trenutka bilo proglašeno nelegalnim. *NED* ubrizgava injekcije "kratkoročnih donacija" unutar izbornih sistema stranih zemalja, u korist jedne strane. Zamislite samo šta par stotina hiljada dolara može napraviti za pomoć nekom političaru ili partiji u relativno siromašnoj zemlji. Naročito je Orwelianski nazivati američku manipulaciju inostranim izbornim procesom "promocija demokratije". Kako bi se Amerikanci osjećali kada bi Kinezi pristigli s milionima dolara da podrže izvjesne kandidate koje Kina smatra prijateljskim – za Kinu? Da li bi to bilo prepoznato kao demokratski događaj?

U izvrsnoj studiji ove gluposti zvane *Nacionalni fond za demokratiju*, Barbara Conry primjećuje:

"*NED*, kog su samog u prošlosti opterećivali i korupcija i finansijske pronevjere, je u najboljem slučaju površna, a često i destruktivna institucija. Kroz ovaj *Fond*, američki poreski obveznici plaćaju raznim interesnim grupama da šikaniraju demokratski izabrane Vlade prijateljskih zemalja, miješaju se u izborni sistem stranih zemalja, te podstiču korupciju u demokratskim pokretima..."

"Kontroverza koja okružuje *NED* dovodi u pitanje ispravnost davanja jednoj kvaziprivatnoj organizaciji ovlaštenja da se bavi nečim što je u biti nezavisna vanjska politika pod maskom 'promoviranja demokratije'. Zagovornici *NED*-a drže da je neophodno imati privatnu organizaciju u toj ulozi kako bi se prevazišle smetnje koje ograničavaju aktivnosti jedne vladine agencije, a onda ipak insistiraju da upravo američki poreski obveznici pokriju sve troškove ove inicijative. Protivnici *NED*-a ukazuju na neizbježnu kontradikciju u kojoj je jedna, iz javnih izvora finansirana organizacija, zadužena za vođenje vanjske politike (kao ovlaštenje koje Ustav SAD daje isključivo Saveznoj Vladi) ali uprkos tome oslobođena od praktično svakog političkog i upravnog nadzora..."

"...U konačnici, *Fond* je postao oličenje onog najnegativnijeg aspekta privatne kao i zvanične (Vladine) pomoći inostranstvu – opasnost decentralizovane 'odapete puške' u naporima vanjske politike, kombinovano s utiskom da Sjedinjene Države pokušavaju biti 'kapo' cijelom svijetu."

Nacionalni fond za demokratiju je za svoje finansiranje ovisan o američkim poreskim obveznicima, ali pošto nije i Vladina agencija, nije ni podložan nadzoru američkog Kongresa. Uistinu je riječ o prebogato finansiranoj odapetoj pušci vanjske politike.

Od svog osnivanja 1983. g, *Nacionalni fond za demokratiju* predvodio je Carl Gershman, član neotrockističke partije Socijaldemokrata SAD-a.

Ovo je možda jedan od razloga zašto je većina onog što je *NED* učinio u bivšem Komunističkom bloku zemalja završilo tako što su se time okoristili bivši komunisti u tim zemljama. Kao što je direktorica Helsinške grupe za ljudska prava Christine Srone napisala:

"*IRI* i *NDI* većinom finansira *Nacionalni fond za demokratiju (NED)*... koji zauzvrat dobiva novce od američkih poreskih obveznika. Svi su već radili na tome da na vlast vrate bivše visokorangirane komuniste, što je također značilo i kooptiranje "pješadije" iz redova nove ljevice sa ekstremno liberalnim idejama..."

Skender Gjinushi, predsjednik Parlamenta Albanije sredinom 2000-tih, može zahvaliti *IRI*-u za pomoć u pisanju Ustava Albanije 1998. Ono što vam *IRI* neće reći jest da je Gjinushi sve do 1990. g. bio član brutalnog staljinističkog Politbiroa Komunističke partije Envera Hodže, te jedan od glavnih organizatora nemira koji su doveli do rušenja Demokratske partije Albanije 1997. i tom prilikom smrti preko 2000 ljudi.

Predsjednik Bugarske Stojanov trabunja i ovakve stvari: "Bez podrške *IRI*-a ne bismo postigli ovoliko puno ovako brzo." Uistinu. Uistinu. Tako su daleko otišli, da je Ivan Kostov (koji je još jedna od dika na čast *IRI*-u) katapultiran sa svog mjesta nastavnika Marksizma—Lenjinizma na Univerzitetu u Sofiji, na mjesto Premijera Bugarske i vođe "reformi".

U Slovačkoj, *NED* je financirao nekoliko inicijativa usmjerenih ka obaranju demokratski izabrane Vlade Premijera Vladimira Mečijara kog je, zanimljivo, prethodni komunistički režim – proganjao. Nakon izborâ *IRI* se u jednom cirkularnom pismu hvalisao da su "*IRI*-eve ankete promijenile prirodu kampanje", dodavši i to da su napori *IRI*-a osigurali "pobjedu reformistima u Slovačkoj". Ono što vam *IRI* neće reći jest da su mnogi od ovih "reformista" bili vodeći članovi komunističkog režima tadašnje Čehoslovačke. Je li to demokratija?

Direktor *IRI*-a George A. Folsom, hvalio je puč protiv demokratski izabranog Predsjednika Venecuele, sljedećim riječima: "Sinoć, pod vodstvom svih segmenata civilnog društva, narod Venecuele je ustao da odbrani demokratiju u njihovoj zemlji." Poslije je obznanjeno da je *Nacionalni fond za demokratiju* osigurao finansiranje onim organizacijama koje su i započele nasilje na ulicama protiv legalnih lidera Venecuele. Poginulo je više od desetine civila, a stotine su ranjeni u ovom pokušaju državnog udara. Je li ovo promoviranje demokratije?

Miješanjem u izborne procese i unutrašnju politiku stranih zemalja, *Nacionalni fond za demokratiju* čini Sjedinjenim Državama više štete nego koristi. *NED* kreira bijes i ljutnju prema Sjedinjenim Državama kod miliona ljudi u svijetu. Odavno je već krajnje vrijeme da se ovoj zaostavštini iz Hladnog rata oduzmu finansije, i da se vratimo vanjskoj politici naših osnivača Nacije, utemeljenoj na otvorenim odnosima i trgovini sa svim zemljama, oslobođeni miješanja i manipulacije nad unutrašnjim stvarima drugih.

<http://www.antiwar.com/paul/paul79.html>